

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијски савјет

MIŠLJENJE

Po zahtjevu advokata Daria Popovića iz Teslića, o obavezi podnošenja prijave koncentracije

Sarajevo, februar 2026. godina



Broj: 07-26-7-025-4/26
Sarajevo, 18.02.2026. godina

Na osnovu člana 25. stav (1) tačka f) Zakona o konkurenciji ("Službeni glasnik BiH" 48/05, 76/07 i 80/09), a po Zahtjevu advokata Daria Popovića, Ul. I. Krajiškog korpusa 9G, 74270 Teslić, zaprimljenog od strane Konkurencijskog vijeća Bosne i Hercegovine, dana 19.12.2025. godine, pod brojem: 07-26-7-025-1/26, Konkurencijsko vijeće, na svojoj 40. (četrestoj) sjednici održanoj dana 18.02.2026. godine, je donijelo

M I Š L J E N J E

Privredni subjekti „Bogdanić DB“ doo Teslić, Buletić b.b., 74270 Teslić (dalje u tekstu: „Bogdanić DB“) i Fabrika obuće „FOT“ doo Teslić, ul. Krajska b.b., 74270 Teslić (dalje u tekstu: „FOT“), zastupani po advokatu Dariu Popoviću, ul. I. Krajiškog korpusa 9G, 74270 Teslić (dalje u tekstu: Podnosilac zahtjeva) podnijeli su Konkurencijskom vijeću Bosne i Hercegovine (dalje u tekstu: Konkurencijsko vijeće) dana 19.12.2025. godine, pod brojem: 07-26-7-025-1/26, Zahtjev za davanjem mišljenja u pogledu postojanja obaveze podnošenja prijave koncentracije (dalje u tekstu: Zahtjev) u smislu odredbi člana 12. Zakona o konkurenciji ("Službeni glasnik BiH" 48/05, 76/07 i 80/09)(dalje u tekstu: Zakon).

Podnosilac Zahtjeva u bitnom navodi slijedeće:

- da je privredni subjekt „Bogdanić DB“, registrovan kao društvo sa ograničenom odgovornošću, čija je pretežna djelatnost - površinska obrada i prevlačenje metala, u 100% vlasništvu fizičkog lica ¹(..)**;
- da je privredni subjekt „FOT“, registrovan kao društvo sa ograničenom odgovornošću, čija je pretežna djelatnost – proizvodnja ostalog namještaja, u 100% vlasništvu privrednog subjekta „Bogdanić DB“;
- da su se ova dva privredna subjekta dana 2.12.2025. godine, zajednički usaglasili i potpisali Nacrt Ugovora o statusnoj promjeni spajanja uz pripajanje;
- Nacrtom ugovora predviđeno je da privredni subjekt „Bogdanić DB“, postaje „društvo sticalac“, dok privredni subjekt „FOT“, postaje „društvo prestalo pripajanjem ili društvo prenosilac“;
- Predmet ovog ugovora jeste spajanje uz pripajanje, tako što „društvo prestalo pripajanjem“ prenosi svoju cjelokupnu imovinu „društvu sticaocu“ i prestaje sa postojanjem bez sprovođenja likvidacije;
- datum spajanja uz pripajanje je datum registracije ove statusne promjene kod Okružnog privrednog suda u Doboju;
- predmetni Zahtjev za mišljenjem, podnesen je u svrhu kompletiranja dokumentacije potrebne za podnošenje prijave za upis u registar poslovnih subjekata statusne promjene spajanja uz pripajanje;

¹(..)** podatak predstavlja poslovnu tajnu

- uz zahtjev je priložena finansijska dokumentacija za 2024. godinu za oba privredna subjekta, rješenja o registraciji, razvrstavanje oba privredna subjekta po djelatnostima, JIB, PIB i Nacrt Ugovora o statusnoj promjeni spajanja uz pripajanje;

- u skladu s naprijed navedenim, Podnosilac traži mišljenje da li se opisana situacija ima smatrati koncentracijom u smislu člana 12. Zakona, te da li u predmetnom slučaju postoji obaveza podnošenja prijave koncentracije.

U vezi sa podnesenim Zahtjevom, Konkurencijsko vijeće navodi sljedeće:

Članom 12. stav (1) Zakona, propisano je šta se smatra koncentracijom:

a) spajanje ili pripajanje **nezavisnih privrednih subjekata** ili dijelova privrednih subjekata

b) sticanje kontrole ili dominantnog uticaja jednog, odnosno više privrednih subjekata nad drugim, odnosno nad više drugih privrednih subjekata ili dijelom drugog privrednog subjekta, odnosno dijelovima drugih privrednih subjekata, i to:

1. sticanjem kupovinom većine dionica ili udjela osnovnog kapitala; ili
2. sticanje većine prava glasa; ili
3. na drugi način, u skladu sa odredbama zakona koji regulišu osnivanje privrednih subjekata i njihovo upravljanje;

c) zajedničko ulaganje na dugoročnoj osnovi, dva ili više nezavisnih privrednih subjekata, koji djeluju kao nezavisan privredni subjekt.

Ovdje je bitno razlikovati pojam „nezavisnog privrednog subjekta“ od pojma „privrednog subjekta pod kontrolom drugog privrednog subjekta“ u smislu vlasničke strukture istih.

Naime u članu 2. stav (2) Zakona, definisan je pojam „privrednog subjekta pod kontrolom drugog privrednog subjekta“, gdje je navedeno u kojim se sve slučajevima privredni subjekat ne može smatrati nezavisnim, odnosno kada se isti imaju smatrati privrednim subjektom pod kontrolom drugog privrednog subjekta.

Nadalje, članom 14. stav (1) Zakona, propisano je da su učesnici namjeravanu koncentraciju obavezni prijaviti kada su ispunjeni sljedeći uslovi:

a) da ukupni godišnji prihod svih učesnika koncentracije ostvaren prodajom roba i/ili usluga na svjetskom tržištu iznosi 100.000.000,00 KM po završnom računu u godini koja je prethodila koncentraciji; i

b) da ukupni godišnji prihod **svakog od najmanje dva** privredna subjekta učesnika koncentracije ostvaren prodajom roba i/ili usluga na tržištu Bosne i Hercegovine iznosi najmanje 8.000.000,00 KM po završnom računu u godini koja je prethodila koncentraciji, ili ako je njihov zajednički tržišni udio veći od 40,0%.

Članom 2. Odluke o načinu podnošenja prijave i kriterija za ocjenu koncentracija privrednih subjekata („Službeni glasnik BiH“, broj 34/10) propisano je da su namjeravanu koncentraciju iz člana 12. Zakona, učesnici koncentracije obavezni prijaviti i to:

a) privredni subjekti sa sjedištem i prebivalištem u inostranstvu ukoliko su ispunjeni uslovi iz člana 14. stav (1) tačke a) i b) Zakona, i

b) privredni subjekti sa sjedištem i prebivalištem u Bosni i Hercegovini ukoliko su ispunjeni uslovi iz člana 14. stav (1) tačka b) Zakona.

Iz navedenog proizilazi da je Podnosilac dužan podnijeti prijavu koncentracije Konkurencijskom vijeću u smislu člana 16. Zakona, samo ukoliko su ispunjeni uslovi iz člana 12. i 14. stav (1) tačka b) Zakona.

Ovo mišljenje je dato isključivo na osnovu navoda iz predmetnog Zahtjeva, te priložene dokumentacije i isto se ne može primijeniti u slučaju da stvarni podaci odstupaju od podataka dostavljenih u istom.

Predsjednica

Ninela Salihbašić